

摘藻堂四庫全書薈要

史部



欽定四庫全書薈要

史部

通志卷一百九上

詳校官員外郎

臣楊世綸





欽定四庫全書薈要卷九千十八

史部

通志卷一百九上

宋 右迪功郎 鄭樵 漁仲 撰

列傳第二十二上

後漢

張宗 法雄 滕撫 馮緄 度尚 抗徐張磐 楊璇

班彪 馮第五倫 曾孫鍾離意 宋均 族子意 寒朗

朱暉 孫 樂恢 何敞 鄧彪 張禹 徐防 張



敏 胡廣

袁安

子敬玄孫閎

張酺

韓棱

周榮

孫景

郭躬

弟子鎮

陳寵

子忠

班超

子勇

梁懂

何熙

張宗字諸君南陽魯陽人也王莽時為縣陽泉鄉佐會  
莽敗義兵起宗乃率陽泉民三四百人起兵略地西至  
長安更始以宗為偏將軍宗見更始政亂因將家屬客  
安邑及大司徒鄧禹西征定河東宗詣禹自歸禹聞宗  
素多權謀乃表為偏將軍禹軍到枸邑赤眉大衆且至  
禹以枸邑不足守欲引師進就堅城而衆人多畏賊追



憚為後拒禹乃書諸將名於竹簡署其前後亂著笥中  
令各探之宗獨不肯探曰死生有命張宗豈辭難就逸  
乎禹歎息謂曰將軍有親弱在營奈何不顧宗曰愚聞  
一卒畢力百人不當萬夫致死可以橫行宗今擁兵數  
千以承大威何遽其必敗乎遂留為後拒諸營既引兵  
宗方勒厲軍士堅壘壁以死當之禹到前縣議曰以張  
將軍之衆當百萬之師猶以少雪投沸湯雖欲戮力其  
勢不全也乃遣步騎二千人反還迎宗宗引兵始發而



赤眉卒至宗與戰卻之乃得歸營於是諸將伏其勇及還到長安宗夜將銳士入城襲赤眉中牟貫脾又轉攻諸營保為流矢所激皆幾至於死及鄧禹徵還光武以宗為京輔都尉將突騎與征西大將軍馮異共擊關中諸營保破之遷河南都尉建武六年都尉官省拜太中大夫八年潁川桑中盜賊羣起宗將兵擊定之後青冀盜賊屯聚山澤宗以謁者督諸郡兵討平之十六年琅邪北海盜賊復起宗督二郡兵討之乃設方略明購賞



皆悉破散於是沛楚東海臨淮羣盜懼其威武相捕斬者數千人青徐震慄後遷琅邪相其政好嚴猛敢殺伐永平二年卒於官

法雄字文彊扶風郿人也齊襄王法章之後秦滅齊子孫不敢稱田姓故以法為氏宣帝時徙三輔世為二千石雄初仕郡功曹辟太傅張禹府舉雄高第除平氏長善政事好發摘姦伏盜賊稀發吏民畏愛之南陽太守鮑得上其理狀遷宛陵令永初三年海賊張伯路等三



千餘人冠赤幘服絳衣自稱將軍寇濱海九郡殺二千石令長初遣侍御史龐雄督州郡兵擊之伯路等乞降尋復屯聚明年伯路復與平原劉文河等三百餘人稱使者攻厭次城殺長史轉入高唐燒宮寺出擊囚渠帥皆稱將軍共朝謁伯路冠五梁冠佩印綬黨衆浸盛乃遣御史中丞王宗持節發幽冀諸郡兵合數萬人乃徵雄為青州刺史與王宗并力討之連戰破賊斬首溺死者數百人餘皆奔走收器械財物甚衆會赦詔到賊猶



以軍甲未解不敢歸降於是王宗召刺史太守共議皆  
以為當遂擊之雄曰不然兵凶器戰危事勇不可恃勝  
不可必賊若乘船浮海深入遠島攻之未易也及有赦  
令可且罷兵以慰誘其心執必解散然後圖之可不戰  
而定也宗善其言即罷兵賊聞大喜乃還所略人而東  
萊郡兵獨未解甲賊復驚恐遁走遼東止海島上五年  
春乏食復抄東萊間雄率郡兵擊破之賊逃還遼東遼  
東人李久等共斬平之於是州界清靜雄每行部錄囚



徒察顏色多得情偽長吏不奉法者皆解印綬去在州  
四年遷南郡太守斷獄省少戶口益增郡濱帶江沔又  
有雲夢藪澤永初中多虎狼之暴前太守賞募張捕反  
為所害者甚衆雄乃移書屬縣曰凡虎狼之在山林猶  
人之居城市古者至化之世猛獸不擾皆由恩信寬澤  
仁及飛走太守雖不德敢忘斯義記到其毀壞檻穽不  
得妄捕山林是後虎害稍息人以獲安在郡數歲歲常  
豐稔初平中卒官子真在逸民傳



滕撫字叔輔北海劇人也初仕州郡稍遷為涿令有文武才用太守以其能委任郡職兼領六縣風政修明流愛于人在事七年道不拾遺順帝末揚徐盜賊羣起磐牙連歲建康元年九江范容周生等相聚反亂屯據歷陽為江淮巨患遣御史中丞馮緄將兵督揚州刺史尹耀九江太守鄧顯討之耀顯軍敗為賊所殺又陰陵人徐鳳馬勉等復寇郡縣殺掠吏人鳳衣絳衣帶黑綬稱無上將軍勉皮冠黃衣帶玉印稱皇帝營於當塗山中



乃建年號置百官遣別帥黃虎攻沒合肥明年廣陵賊張嬰等復收衆數千人反據廣陵朝廷博求將帥三公舉撫有文武才拜為九江都尉與中郎將趙序助馮緄合州郡兵數萬人共討之又廣開賞募錢邑各有差梁太后慮羣賊屯結諸將不能制又遣太尉李固未及行會撫等進擊大破之斬馬勉范容周生等千五百級徐鳳遂將餘衆攻燒東城縣下邳人謝安應募率其宗親設伏擊鳳斬之封安為平鄉侯邑三千戶拜撫中郎將



督揚徐二州事撫復進擊張嬰斬獲千餘人趙序坐畏懦不進詐增首級徵還棄市又歷陽賊華孟自稱黑帝攻九江殺郡守撫乘勝進擊破之斬孟等三千八百級虜獲七百餘人牛馬財物不可勝算於是東南悉平振旅而還以撫為左馮翊除一子為郎撫所得賞賜盡分於麾下性方直不交權執宦官懷忿及論功當封太尉胡廣時錄尚書事承旨奏黜撫天下怨之卒於家

馮緄字鴻卿巴郡宕渠人也少學春秋司馬兵法父煥



安帝時為幽州刺史疾忌姦惡數致其罪時元菟太守姚光亦失人和建光元年怨者乃詐作璽書譴責煥光賜以歐刀又下遼東都尉龐奮使速行刑奮即斬光收煥煥欲自殺緄疑詔文有異止煥曰大人在州志欲去惡實無他故必是凶人妄詐規肆姦毒願以事自上甘罪無晚煥從其言上書自訟果詐者所為徵奮抵罪會煥病死獄中帝愍之賜煥光錢各十萬以子為郎中緄由是知名家富好施賑赴窮急為州里所歸愛初舉孝



廉七遷為廣漢屬國都尉徵拜御史中丞順帝末以緄  
持節督揚州諸郡軍事與中郎將滕撫擊破羣賊遷隴  
西太守後鮮卑寇邊以緄為遼東太守曉喻降集虜皆  
弭散徵拜京兆尹轉司隸校尉所在立威刑遷廷尉太  
常時長沙蠻寇益陽屯聚積久至延熹五年衆轉盛而  
零陵蠻賊復反應之合二萬餘人攻燒城郭殺傷長吏  
又武陵蠻夷悉反寇略江陵間荊州刺史劉度南郡太  
守李肅並奔走荆南皆沒於是拜緄為車騎將軍將兵



十萬討之詔命有司祖於國門時天下飢饉帑藏虛盡  
每出征伐常減公卿奉祿假王侯租賦前後所遣將帥  
宦官輒陷以折耗軍資往往抵罪緄性烈直不行賄賂  
懼為所中乃上疏曰執得容姦伯夷可疑苟曰無猜盜  
跖可信故樂羊陳功文侯示以謗書願請中常侍一人  
監軍財費尚書朱穆奏緄以財自嫌失大臣之節有詔  
勿劾緄軍至長沙賊聞悉詣營道乞降進擊武陵蠻夷  
斬首四千餘級受降十餘萬人荊州平定詔書賜錢一



億固讓不受振旅還京師推功於從事中郎應奉薦以  
為司隸校尉而上書乞骸骨朝廷不許監軍使者張敞  
承宦官旨奏緄將傳婢二人戎服自隨又輒於江陵刻  
石紀功請下吏案理尚書令黃雋奏議以為罪無正法  
不合致糾會長沙賊復起攻桂陽武陵緄以軍還盜賊  
復發策免項之拜將作大匠轉河南尹上言舊典中官  
子弟不得為牧人職帝不納遂復為廷尉時山陽太守  
單遷以罪繫獄緄考致其死遷故車騎將軍單超之弟



中官相黨遂共誹章誣緄坐與司隸校尉李膺大司農  
劉祐俱輸左校應奉上疏理緄等得免後拜屯騎校尉  
復為廷尉卒於官緄弟允清白有孝行能理尚書善推  
步之術拜降虜校尉終於家

度尚字博平山陽湖陸人也家貧不修學行不為鄉里  
所推舉積困窮乃為宦者同郡侯覽視田得為郡上計  
吏拜郎中除上虞長為政嚴峻明於發擿姦非吏人謂  
之神明遷文安令遇時疾疫穀貴民飢尚開倉廩給營



救病者百姓蒙其濟時冀州刺史朱穆行部見尚甚奇之延熹五年長沙零陵賊七八千人自稱將軍入桂陽蒼梧南海交趾交趾刺史及蒼梧太守望風逃奔二郡皆沒遣御史中丞盛修募兵討之不能尅豫章艾縣六百餘人應募不得賞直怨恚遂反焚燒長沙郡縣寇益陽殺縣令衆漸盛又遣謁者馬睦持節督荊州刺史劉度擊之軍敗睦度奔走桓帝詔公卿舉任代劉度者尚書朱穆舉尚自右校令擢為荊州刺史尚躬率部曲與



同勞逸廣募雜種諸蠻夷明設購賞進擊大破之降者數萬人桂陽宿賊渠帥卜陽潘鴻等畏尚威烈徙入山谷尚窮追數百里遂入南海破其三屯多獲珍寶而陽鴻黨衆猶盛尚欲擊之而士卒驕富莫有鬪志尚計緩之則不戰逼之則逃亡乃宣言卜陽潘鴻作賊十年習於攻守今兵寡少未易可進當須諸郡所發悉至爾乃并力攻之申令軍中恣聽射獵兵士喜悅大小皆相與從禽尚乃密使所親客潛焚其營珍積皆盡獵者來還



莫不泣涕尚人人慰勞深自咎責因曰卜陽等財寶足  
富數世諸卿但不并力耳所亡少少何足介意衆聞咸  
憤踊尚敕令秣馬蓐食明旦徑赴賊屯陽鴻等自以深  
固不復設備吏士乘銳遂大破平之尚出兵三年羣寇  
悉定七年封右鄉侯遷桂陽太守明年徵還京師時荆  
州兵朱蓋等征戍役久財賞不贍恚忿復作亂與桂陽  
賊胡蘭等三千餘人復攻桂陽焚燒郡縣太守任允棄  
城走賊衆遂至數萬轉攻零陵太守陳球固守拒之於



是以尚為中郎將將幽冀黎陽烏桓步騎二萬六千人  
救球又與長沙太守抗徐等發諸郡兵并執討擊大破  
之斬蘭等首五千五百級餘賊走蒼梧詔賜尚錢百萬  
餘人各有差時抗徐與尚俱為名將數有功徐字伯徐  
丹陽人鄉邦稱其膽智初試守宣城長悉移深林遠藪  
椎髻鳥語之人置於縣下由是境內無復盜賊後為中  
郎將宗資別部司馬擊太山賊公孫舉等破平之斬首  
三千餘級封烏桓東鄉侯五百戶遷太山都尉寇盜望



風奔亡及在長沙宿賊皆平卒於官桓帝下詔追增封  
徐五百戶并前千戶復以尚為荊州刺史尚見胡蘭餘  
黨南走蒼梧懼為已負乃偽上言蒼梧賊入荊州界於  
是徵交趾刺史張磐下廷尉辭狀未正會赦見原磐不  
肯出獄方更牢持械節獄吏謂磐曰天恩曠然而君不  
出何哉磐因自列曰前長沙賊胡蘭作難荊州餘黨散  
入交趾磐身嬰甲冑涉危履險討擊凶患斬殄渠帥餘  
燼鳥竄遁還奔荊州度尚懼磐先言怖畏罪戾伏奏



見誣磐備位方伯為國爪牙而為尚所枉受罪牢獄夫  
事有虛實法有是非磐實不辜赦無所除如忍以苟免  
永受侵辱之耻生為惡吏死為敝鬼乞傳尚詣廷尉面  
對曲直足明真偽尚不徵者磐埋骨牢檻終不虛出望  
塵受枉廷尉以其狀上詔書徵尚到廷尉辭窮受罪以  
先有功得原磐字子石丹陽人以清白稱終於廬江太  
守尚後為遼東太守數月鮮卑率兵來攻尚與戰破之  
戎狄憚畏年五十一延熹五年卒於官



楊璇字璣平會稽烏傷人也高祖父茂本河東人從光武征伐為威寇將軍封烏傷新陽鄉侯建武中就國傳封三世有罪國除因而家焉父扶交趾刺史有理能名兄喬為尚書容儀偉麗數上言政事桓帝愛其才貌詔妻以公主喬固辭不聽遂閉口不食七日而死璇初舉孝廉稍遷靈帝時為零陵太守是時蒼梧桂陽猾賊相聚攻郡縣賊衆多而璇力弱吏人憂恐璇乃特制馬車數十乘以排蒲拜反囊盛石灰於車上繫布索於馬尾又



為兵車專轂弓弩尅共會戰乃令馬車居前順風鼓灰  
賊不得視因以火燒布布然馬驚奔突賊陣因使後車  
弓弩亂發鉦鼓鳴震羣寇披駭破散追逐傷斬無數梟  
其渠帥郡境以清荊州刺史趙凱誣奏璇實非身破賊  
而妄有其功璇與相章奏凱有黨助遂檻車徵璇防禁  
嚴密無由自訟乃噬臂出血書衣為章具陳破賊形勢  
又言為凱所誣潛令親屬詣闕通之詔書原璇拜議郎  
凱反受誣人之罪璇三遷為渤海太守所在有異政以



事免後尚書令張溫特表薦之徵拜尚書僕射以病乞骸骨卒於家

班彪字叔皮扶風安陵人也祖況成帝時為越騎校尉父稚哀帝時為廣平太守彪性沈重好古年二十餘更始敗三輔大亂時隗囂擁衆天水彪乃避難從之囂問彪曰往者周亡戰國並爭天下分裂數世然後定意者從橫之事復起於今乎將承運迭興在於一人也願生試論之對曰周之廢興與漢殊異昔周爵五等諸侯專



政本根既微而枝葉彊大故其末流有從橫之事執數  
然也漢承秦制改立郡縣主有專已之威臣無百年之  
柄至於成帝假借外家哀平短祚國嗣三絕故王氏擅  
朝因號竊位危自上起傷不及下是以即真之後天下  
莫不引領而歎十餘年間中外騷擾遠近俱發假號雲  
合咸稱劉氏不謀同辭方今雄桀帶州域者皆無七國  
世業之資而百姓謳吟思仰漢德已可知矣囂曰生言  
周漢之執可也至於但見愚人習識劉氏姓號之故而



謂漢家復興疎矣昔秦失其鹿劉季逐而羈之時人豈復知漢乎彪既疾囂言又傷時方艱乃著王命論以為漢德承堯有靈命之符王者興祚非詐力所致欲以感之而囂終不寤遂避地河西河西大將軍竇融以為從事深敬待之接以師友之道彪乃為融畫策事漢總西河以拒隗囂及融徵還光武問曰所上章奏誰與參之融對曰皆從事班彪所為帝雅聞彪才因召入見舉司隸茂才拜徐令以病免後數應三公之命輒去彪既才



高而好述作遂專心史籍之間武帝時司馬遷著史記自太初以後闕而不錄後好事者頗復綴集時事然多鄙俗不足以踵繼其書彪乃繼採前史遺事傍貫異聞作後傳數十篇因斟酌前史而譏正得失其略論曰唐虞三代詩書所及世有史官以司典籍暨於諸侯國自有史故孟子曰楚之檇杙晉之乘魯之春秋其事一定哀之間魯君子左丘明論集其文作左氏傳三十篇又撰異同號曰國語二十篇由是乘檇杙之事遂闕而



左氏國語獨章又有記錄黃帝以來至春秋時帝王公  
侯卿大夫號曰世本一十五篇春秋之後七國並爭秦  
并諸侯則有戰國策三十三篇漢興定天下太中大夫  
陸賈記錄時功作楚漢春秋九篇孝武之世太史令司  
馬遷採左氏國語刪世本戰國策據秦漢列國時事上  
自黃帝下訖獲麟作本紀世家列傳書表凡百三十篇  
而十篇缺焉遷之所記從漢元至武則絕其功也至於  
採經摭傳分散百家之事甚多踈略不如其本務欲以



多聞廣載為功論議淺而不篤其論術學則崇黃老而薄五經序貨殖則輕仁義而羞貧窮道游俠則賤守節而貴俗功此其大敝傷道所以遇極刑之咎也然善述序事理辯而不華質而不俚文質相稱蓋良史之才也誠令遷依五經之法言同聖人之是非意亦庶幾矣夫百家之書猶可法也若左氏國語世本戰國策楚漢春秋太史公書今之所以知古後之所由觀前聖人之耳目也司馬遷序帝王則曰本紀公侯傳則曰世家卿士



特起則曰列傳又進項羽陳涉而黜淮南衡山細意委曲條例不經若遷之著作採獲古今貫穿經傳至廣博也一人之精文重思煩故其書刊落不盡尚有盈辭多不齊一若序司馬相如舉郡縣著其字至蕭曹陳平之屬及董仲舒並時之人不記其字或縣而不郡者蓋不暇也今此後篇慎覈其事整齊其文不為世家唯紀傳而已傳曰殺史見極平易正直春秋之義也彪復辟司徒王肅音肅況府時東宮初建諸王國並開而官屬未備師



保多闕彪上言曰孔子稱性相近習相遠也賈誼以為  
習與善人居不能無善猶生長於齊不能無齊言也習  
與惡人居不能無惡猶生長於楚不能無楚言也是以  
聖人審所與居而戒慎所習昔成王之為孺子出則周  
公召公史佚入則太顛閔夭南宮括散宜生左右前後  
禮無違者故成王一日即位天下曠然太平是以春秋  
愛子教以義方弗納於邪驕奢淫佚所自邪也詩云貽  
厥孫謀以燕翼子言武王之謀遺子孫也漢興太宗使



鼂錯導太子以法術賈生教梁王以詩書及至中宗亦  
令劉向王褒蕭望之周堪之徒以文章儒學保訓東宮  
以下莫不崇簡其人就成德器今皇太子諸王雖結髮  
學問修習禮樂而傅相未值賢才官屬多闕舊典宜博  
選名儒有威重明通政事者以為太子太傅東宮及諸  
王國備置官屬又舊制太子食湯沐十縣設周衛交戟  
五日一朝因坐東廂省視膳食其非朝日使僕中允旦  
旦請問而已明不媒黷廣其敬也書奏帝納之後察司



徒廉為望都長吏民愛之建武三十年年五十二卒官  
所著賦論書記奏事合九篇二子固超超別有傳固字  
孟堅年九歲能屬文誦詩書及長遂博貫載籍九流百  
家之言無不窮究所學無常師不為章句舉大義而已  
性寬和容衆不以才能高人諸儒以此慕之永平初東  
平王蒼以至戚為驃騎將軍輔政開東閣延英雄時固  
始弱冠奏記於蒼薦故司空掾桓梁京兆祭酒晉馮扶  
風掾李育京兆督郵郭基涼州從事王雍弘農功曹史



殷肅言此六子皆有殊行絕才德隆當世宜蒙徵納以  
輔高明蒼納之父彪卒歸鄉里固以彪所續前史未詳  
乃潛精研思欲就其業既而有人上書顯宗告固私作  
國史者有詔下郡收固繫京兆獄盡取其家書先是扶  
風人蘓郎偽言圖讖事下獄死固弟超恐固不能自明  
乃馳詣闕上書得召見具言固所著述意而郡亦上其  
書顯宗甚奇之召詣校書郎除蘭臺令史與前睢陽令  
陳宗長陵令尹敏司隸從事孟異共成世祖本紀遷為



郎典校秘書固又撰功臣平林新市公孫述事作列傳  
載記二十八篇奏之帝乃復使終成前所著書固以為  
漢紹堯運以建帝業至於六世史臣乃追述功德私作  
本紀編於百王之末廁於秦項之列太初以後闕而不  
錄故探撰前記綴集所聞以為漢書起元高祖終於孝  
平王莽之誅十有二世二百三十年綜其行事傍貫五  
經上下洽通為春秋考記表志傳凡百篇固自永平中  
始受詔潛精積思二十餘年至建初中乃成當世甚重



其書學者莫不諷誦焉自為郎後遂見親近時京師修起宮室濬繕城隍而關中耆老猶望朝廷西顧因感前世相如壽王東方之徒造構文辭終以諷勸乃上兩都賦盛稱洛邑制度之美以折西賓淫侈之論其辭曰有西都賓問於東都主人曰蓋聞皇漢之初經營也嘗有意乎都河洛矣輟而弗康實用西遷作我上都主人聞其故而覩其制乎主人曰未也願賓攄懷舊之蓄念發思古之幽情博我以皇道弘我以漢京賓曰唯唯漢之



西都在於雍州實曰長安左據函谷二嶠之阻表以太  
華終南之山右界褒斜隴首之險帶以洪河涇渭之川  
衆流之隈汧涌其西華實之毛則九州之上腴焉防禦  
之阻則天地之奧區焉是故橫被六合三成帝畿周以  
龍興秦以虎視及至大漢受命而都之也仰寤東井之  
精俯協河圖之靈奉春建策留侯演成天人合應以發  
皇明乃眷西顧實惟作京於是晞秦嶺賊北阜挾鄠灊  
據龍首圖皇基於億載度宏規而大起肇自高而終平



世增飾以宗麗厯十二之延祚故窮泰而極修建金城  
其萬雉呀周池而成淵披三條之廣路立十二之通門  
內則街衢洞達閭閻且千九市開場貨別隧分人不得  
顧車不得旋闐城溢郭傍流百廛紅塵四合烟雲相連  
於是既庶且富娛樂無疆都人士女殊異乎五方遊士  
擬於公侯列肆侈於姬姜鄉曲豪俊游俠之雄節慕原  
嘗名亞春陵連交合衆騁驚乎其中若乃觀其四郊浮  
游近縣則南望杜霸北眺五陵名都對郭邑居相承英



俊之域蔽冕所興冠蓋如雲七相五公與乎州郡之豪傑五都之貨殖三選七遷充奉陵邑蓋以強幹弱枝隆上都而觀萬國也封畿之內厥土千里連犖諸夏無其所有其陽則崇山隱天幽林穹谷陸海珍藏藍田美玉商洛緣其隈鄠杜濱其足源泉灌注陂池交屬竹林果園芳草甘木郊野之富號曰近蜀其陰則冠以九嶷陪以甘泉乃有靈宮起乎其中秦漢之所極觀淵雲之所頌歎於是乎存焉下有鄭白之沃衣食之源提封五萬



疆場綺分溝塍刻鏤原隰龍鱗決渠降雨荷雷成雲五  
穀垂穎桑麻敷榮東郊則有通溝大漕潰渭洞河汎舟  
山東控引淮湖與海通波西郊則有上囿禁苑林麓藪  
澤陂池連乎蜀漢繚以周墻四百餘里離宮別館三十  
六所神池靈沼往往而在其中乃有九真之麟大宛之  
馬黃支之犀條支之鳥踰崑崙越巨海殊方異類至三  
萬里其宮室也體象乎天地經緯乎陰陽據坤靈之正  
位倣太紫之圓方樹中天之華闕豐冠山之朱堂因環



材而究竒抗應龍之虹梁列棼橑以布翼荷棟桴而高  
驤雕玉瑱以居楹裁金璧以飾璫發五色之渥彩光燭  
朗以景章於是左礮右平重軒三階閨房周通門闥洞  
開列鍾虡於中庭立金人於端闈仍增崖而衡闕臨峻  
路而啓扉徇以離殿別寢承以崇臺間館煥若列星紫  
宮是環清涼宣溫神仙長年金華玉堂白虎麒麟區宇  
若茲不可殫論增盤崔嵬登降炤爛殊形詭制每各異  
觀乘茵步輦惟所宴息後宮則有掖庭椒房后妃之室



合歡增城安處常寧  
莖若椒風披香發越  
蘭林蕙草鴛鸞飛翔  
之列昭陽特盛隆乎  
孝成屋不呈材牆不  
露形裏以藻繡絡以  
綸連隨侯明月錯落  
其間金釭銜璧是為  
列錢翡翠火齊流耀  
含英懸黎垂棘夜光  
在焉於是玄墀鈎切  
玉階彤庭碾礧彩緻  
琳珉青瑩珊瑚碧樹  
周阿而生紅羅颯纚  
綺組繽紛精曜華燭  
俯仰如神後宮之號  
十有四位窈窕繁華  
更盛迭貴處乎斯列  
者蓋以百數左右廷  
中朝堂百僚之位蕭  
曹魏邴謀謨乎其上



佐命則垂統輔翼則成化流大漢之愷悌盪亡秦之毒  
螫故令斯人揚樂和之聲作畫一之歌功德著乎祖宗  
膏澤洽乎黎庶又有天祿石渠典籍之府命夫諄誨故  
老名儒師傅講論乎六藝稽合乎同異又有承明金馬  
著作之庭大雅宏達於茲為羣元元本本周見洽聞啟  
發篇章校理秘文周以鈎陳之位衛以嚴更之署總禮  
官之甲科羣百辟之薦孝虎賁綴衣闥尹闥寺陞戟百  
重各有攸司周廬千列徼道綺錯輦路經營脩涂飛閣



自未央而連桂宮北彌明光而絙長樂陵登道而超西  
墉混建章而連外屬設壁門之鳳闕上觚稜而棲金爵  
內則別風之嶢峣眇麗巧而聳擢張千門而立萬戶順  
陰陽以開闔爾乃正殿崔嵬層構厥高臨乎未央經駘  
盪而出馭娑洞朽詣與天梁上反宇以蓋戴激日景而  
納光神明鬱其特起遂偃蹇而上躋軼雲雨於太半虹  
霓迴帶於芬楣雖輕迅與僛狡猶愕眙而不敢階攀井  
幹而未半目眴轉而意迷舍櫺檻而却倚若顛墜而復



稽魂怳怳以失度巡迴塗而下低既懲懼於登望降周  
流以傍徨步甬道以縈紆又杳窅而不見陽排飛闥而  
上出若游目於天表似無依之洋洋前唐中而後太液  
覽滄海之湯湯揚波濤於碣石激神嶽之蔣蔣濫瀛洲  
與方壺蓬萊起乎中央於是靈草冬榮神木叢生巖峻  
崢嶸金石崢嶸抗仙掌以承露擢雙立之金莖軼埃塏  
之混濁鮮顥氣之青英騁文成之不誕馳五利之所刑  
庶松喬之羣類時遊從乎斯庭實列仙之攸館非吾人



之所寧爾乃盛娛遊之壯觀奮大武乎上囿因茲以威  
戎夷狄耀威靈而講武事命荊州使起烏詔梁野而驅  
獸毛羣內闐飛羽上覆接翼側足集禁林而屯聚水衡  
虞人理其營表種別羣分部曲有署罟網連絃籠山絡  
野列卒周匝星羅雲布於是乘鸞輿備法駕帥羣臣披  
飛廉入苑門遂繞豐鄔厯上蘭六師發胄百獸駭殫震  
震爚爚雷奔電激草木塗地山淵反覆蹂躪其十二三  
乃撓怒而少息爾乃期門飲飛列刃鑽鏃要趺追蹤鳥



驚觸絲獸駭值鋒機不虛持弦不再控矢無單殺中必  
疊雙胞紛紛增繳相纏風毛雨血灑野蔽天平原赤  
勇士厲獫狁失木豺狼懾竄爾乃移師趨險並蹈潛穢  
窮虎奔突狂兕觸蹙許少施巧秦成力折倚標狡扼猛  
噬脫角挫脰徒搏獨殺挾師豹拖熊螭頓犀犛曳象罷  
超迥壑越峻崖蹙巖鉅石隕松栢仆叢林摧草木無  
餘禽獸殄夷天子乃登屬玉之館歷長楊之榭覽山川  
之體執觀三軍之殺獲原野蕭條目極四裔禽相鎮壓



獸相枕藉然後收禽會衆論功賜昨陳輕騎以行魚騰  
酒車而斟酌割鮮野食舉燧命爵饗賜畢勞逸齊大路  
鳴鸞容與徘徊集乎豫章之宇臨乎昆明之池左牽牛  
而右織女似雲漢之無涯茂樹蔭蔚芳草被隄蘭茝發  
色曄曄猗猗若摛錦布繡燭燿乎其陂鳥則玄鶴白鷺  
黃鵠鵙鵲鷓鴣鳬鷺鴻鴈朝發河海夕宿江漢沈  
浮往來雲集霧散於是後宮乘輶輅登龍舟張鳳蓋建  
華旗祛黼帷鏡清流靡微風澹淡浮櫂女謳鼓吹震聲



激越營厲天鳥羣翔魚窺淵招白鷗下雙鵠掄文竿出  
比目撫鴻量御繒繳方舟並驚俛仰極樂遂乃風舉雲  
搖浮游溥覽前乘秦嶺後越九峻東薄河華西涉歧雍  
宮館所厯百有餘區行所朝夕儲不改供禮上下而接  
山川究休佑之所用采游童之謹謠第從臣之嘉頌于  
斯之時都都相望邑邑相屬國籍十世之基家承百年  
之業士食舊德之名氏農服先疇之畝畝商循族世之  
所鬻工用高曾之規矩祭乎隱隱各得其所若臣者徒



觀迹於舊墟聞之乎故老十分未得其一端故不能徧  
舉也東都主人喟然而歎曰痛乎風俗之移人也子實  
秦人矜夸館室保界河山信識昭襄而知始皇矣烏睹  
大漢之云為乎夫大漢之開原也奮布衣以登皇極繇  
數朞而創萬代蓋六籍所不能談前聖靡得而言焉當  
此之時功有橫而當天討有逆而順民故婁敬度執而  
獻其說蕭公權宜以拓其制時豈泰而安之哉計不得  
以已也吾子曾不是睹顧曜後嗣之末造不亦暗乎今



將語子以建武之治永平之事監乎太清以變子之惑  
志往者王莽作逆漢祚中缺天下致誅六合相滅于時  
之亂生人幾亡鬼神泯絕壑無完樞郭罔遺室原野厭  
人之肉川谷流人之血秦項之灾猶未克半書契以來  
未之或紀也故下人號而上訴上帝懷而降監乃致命  
乎聖皇於是聖皇乃握乾符闡坤珍披皇圖稽帝文赫  
然發憤應若興雲霆擊昆陽憑怒雷震遂超大河跨北  
嶽立號高邑建都河洛紹百王之荒屯因造化之盪滌



體元立制繼天而作系唐統接漢緒茂育羣生恢復疆  
宇勲兼乎在昔事勤乎三五豈特方軌並跡紛綸后辟  
治近古之所務蹈一聖之險易云爾哉且夫建武之元  
天地革命四海之內更造夫婦肇有父子君臣初建人  
倫實始斯乃伏羲氏之所以基皇德也分州土立市朝  
作舟輿造器械斯乃軒轅氏之所以開帝功也龔行天  
罰應天順人斯乃湯武之所以昭王業也遷都改邑有  
殷宗中興之則焉即土之中有周成隆平之制焉不階



尺土一人之柄同符乎高祖克已復禮以奉終始允恭  
乎孝文憲章稽古封岱勒成儀炳乎世宗按六經而校  
德眇古昔而論功仁聖之事既該而帝王之道備矣至  
乎永平之際重熙而累洽盛三雍之上儀修袞龍之法  
服鋪鴻藻信景鑠揚世廟正予樂人神之和允洽羣神  
之序既肅乃動大輅遵皇衢省方巡狩窮覽萬國之有  
無考聲教之所被散皇明以燭幽然後增周舊修洛邑  
翩翩巍巍顯顯翼翼光漢京於諸夏總八方而為之極



是以皇城之內宮室光明闕庭神麗奢不可踰儉不能  
侈外則因原野以作苑順流泉而為沼發蘋藻以潛魚  
豐圃草以毓獸制同乎梁騶義合乎靈囿若乃順時節  
而蒐狩簡車徒以講武則必臨之以王制考之以風雅  
歷騶虞覽駟騏嘉車攻采吉日禮官整儀乘輿乃出於  
是發鯨魚鏗華鐘登玉輅乘時龍鳳蓋颯灑龢鑾玲瓏  
天官景從褻威盛容山靈護野屬御方神雨師汎灑風  
伯清塵千乘雷起萬騎紛紜元戎竟野戈鋌雲羽旄



掃霓旌旗拂天焮焮炎揚光飛文吐爛生風吹野燎  
山日月為之奪明丘陵為之搖震遂集乎中囿陳師按  
屯駢部曲列校隊勒三軍誓將帥然後舉鋒伐鼓申令  
三驅輜車霆激驍騎電驚由基發射范氏施御弦不失  
禽轡不詭遇飛者未及翔走者未及去指顧倏忽獲車  
已實樂不極般殺不盡物馬踣餘足士怒未泄先驅復  
路屬車案節於是薦三犧效五牲禮神祇懷百靈覲明  
堂臨辟雍揚緝熙宣皇風登靈臺考休徵俯仰乎乾坤



參象乎聖躬自中夏而布德瞰四裔而抗稜西盪河源  
東澹海濬北動幽崖南趨朱垠殊方別區界絕而不鄰  
自孝武之所不征孝宣之所未臣莫不陸訢水慄奔走  
而來賓遂綏哀牢開永昌春王三朝會同漢京是日也  
天子受四海之圖籍膺萬國之貢珍內撫諸夏外綏百  
蠻爾乃盛禮興樂供帳置乎雲龍之庭陳百僚而贊羣  
后究皇儀而展帝容於是庭實千品旨酒萬鍾列金罍  
班玉觴嘉珍御太牢饗爾乃食舉雍徹太師奏樂陳金



石布絲竹鐘鼓鏗鉤管絃曄煜抗五聲極六律歌九功  
舞八佾韶武備泰古畢四夷間奏德廣所及傑侏毘離  
罔不具集萬樂備百禮暨皇歡浹羣臣醉降烟燭調元  
氣然後撞鐘告罷百寮遂退於是聖上覩萬方之歡娛  
久沐浴於膏澤懼其侈心之將萌而怠於東作也乃申  
舊章下明詔命有司班憲度昭節儉示太素去後宮之  
麗飾損乘輿之服御抑工商之淫業興農桑之盛務遂  
令海內棄末而反本背偽而歸真女修織紉男務耕耘



器用陶匏服尚素玄恥纖靡而不服賤奇麗而弗珍捐  
金於山沈珠於淵於是百姓滌瑕盪穢而鏡至清形神  
寂寞耳目弗營嗜慾之源滅廉恥之心生莫不優游而  
自得玉潤而金聲是以四海之內學校如林庠序盈門  
獻酬交錯俎豆莘莘下舞上歌蹈德詠仁登降飫宴之  
禮既畢因相與嗟嘆玄德謹言弘說咸含和而吐氣頌  
曰盛哉乎斯世今論者但知誦虞夏之書詠殷周之詩  
講義文之易論孔氏之春秋罕能精古今之清濁究漢



德之所由唯子頗識舊典又徒馳騁乎末流溫故知新  
已難而知德者鮮矣且夫僻界西戎險阻四塞修其防  
禦誰與處乎土中平夷洞達萬方輻輳秦嶺九壅涇渭  
之川曷若四瀆五嶽帶河沂洛圖書之淵建章甘泉館  
御列仙孰與靈臺明堂統和天人太液昆明鳥獸之囿  
曷若辟雍海流道德之富游俠踰侈犯義侵禮孰與同  
履法度翼翼濟濟也子徒習奏阿房之造天而不知京  
洛之有制也識函谷之可闕而不知王者之無外也主



人之辭未終西都賓矍然失容逡巡降階惓然意下捧  
手欲辭主人曰復位今將授予以五篇之詩賓既卒業  
乃稱曰美哉乎斯詩義正乎揚雄事實乎相如匪唯主  
人之好學蓋乃遭遇乎斯時乎小子狂簡不知所裁既  
聞正道請終身而誦之其明堂詩曰於昭明堂明堂孔  
陽聖皇宗祀穆穆煌煌上帝宴饗五位時序誰其配之  
世祖光武普天率土各以其職猗歟緝熙允懷多福其  
辟雍詩曰乃流辟雍辟雍湯湯聖皇莅止造舟為梁皤



皤國老乃父乃兄抑抑威儀孝友光明於赫太上示我  
漢行洪化惟神永觀厥成其靈臺詩曰乃經靈臺靈臺  
既崇帝勤時登爰考休徵三光宣精五行布序習習祥  
風祁祁甘雨百穀溱溱庶卉蕃蕪屢惟豐年於皇樂胥  
其寶鼎詩曰嶽修貢兮川效珍吐金景兮歆浮雲寶鼎  
見兮色紛緼煥其炳兮被龍文登祖廟兮享聖神昭靈  
德兮彌億年其白雉詩曰啓靈篇兮披瑞圖獲白雉兮  
效素烏嘉祥阜兮集皇都發皓羽兮奮翹英容潔朗兮



於淳精章皇德兮侔周成永延長兮膺天慶及肅宗雅  
好文章固愈得幸數入讀書禁中或連日繼夜每行巡  
狩輒獻上賦頌朝廷有大議使難問公卿辯論於前賞  
賜恩寵甚渥固自以二世才術位不過郎感東方朔揚  
雄自論以不遭蘓張范蔡之時作賓戲以自通焉後遷  
元武司馬天子會諸儒講論五經作白虎通德論令固  
撰集其事時北單于遣使貢獻求欲和親詔問羣僚議  
者或以為匈奴變詐之國無內向之心徒以畏漢威靈



逼憚南虜故希望報命以安其離叛今若遣使恐失南  
虜親附之歡而成北狄猜詐之計不可固議曰竊自惟  
思漢興已來曠世厯年兵纏夷狄尤事匈奴綏御之方  
其塗不一或修文以和之或用武以征之或卑下以就  
之或臣服而致之雖屈指無常所因時異然未有拒絕  
棄放不與交接者也故自建武之世復修舊典數重出  
使前後相繼至於其末始乃暫絕永平八年復議通之  
而廷爭連日異同紛回多執其難少言其異先帝聖德



遠覽瞻前顧後遂復出使事同前世以此而推未有一  
世闕而不修者也今烏桓就闕稽首譯官康居月氏自  
遠而至匈奴離析名王來降三方歸服不以兵威此誠  
國家通於神明自然之徵也臣愚以為宜依故事復遣  
使者上可繼五鳳甘露致遠人之會下不失建武永平  
羈縻之義虜使再來然後一往既明中國主在忠信且  
知聖朝禮義有常豈同逆詐示猜孤其善意乎絕之未  
知其利通之不聞其害設後北虜稍彊能為風塵方復



求為交通將何所及不若因今施惠為策近長安又作  
典引篇述叙漢德以為相如封禪靡而不典揚雄美新  
典而不實蓋謂得其致焉太極之原兩儀始分烟烟煜  
煜有沉而奧有浮而清沈浮交錯庶類混成肇命人主  
五德初始同乎草昧元混之中踰繩越契寂寥而亡詔  
者系不得而綴也厥有氏號紹天闡繹者莫不開元於  
太昊皇初之首上哉賈乎其書猶可得而修也亞斯之  
世通變神化函光而未曜若夫上稽乾則降承龍翼而



炳諸典謨以冠德卓絕者莫崇乎陶唐陶唐舍允而禪  
有虞虞亦命夏后稷契熙載越成湯武股肱既周天乃  
歸功元首將授漢劉俾其承三季之荒末值亢龍之灾  
孽元象暗而恒文垂彛倫敦而舊章缺故先命元聖使  
綴學立制宏亮洪業表相祖宗贊揚迪哲備哉燦爛真  
神明之式也雖前世臯夔衡旦密勿之輔比茲褊矣是  
以高光二聖辰居其域時至氣動乃龍見淵躍拊翼而  
未舉則威靈紛紜海內雲蒸雷動霓燦胡縊莽分不蒞



其誅然後欽若上下恭揖羣后正位度宗有于德不台  
淵穆之讓靡號師矢敦奮撫之容蓋以膺當天之正統  
受克讓之歸運蓄炎上之烈精蘊孔佐之弘陳云爾洋  
洋乎若德帝者之上儀詰誓所不及已鋪觀二代洪纖  
之度其蹟可探也並開迹於一匱同受侯甸之所服奕  
世勤民以方伯統牧乘其命賜彤弧黃鉞之威用討韋  
顧黎崇之不格至於三五華夏京遷鎬毫遂自北面虎  
離其師革滅天邑是故義士偉而不敦武稱未盡獲有



慙德不其然與然猶於穆猗那翕純嘏繹以宗嚴祖考  
殷薦宗祀配帝發祥流慶對越天地者烏奕乎千載豈  
不克自神明哉誕略有常審言行於篇籍光藻朗而不  
踰爾矧夫赫赫聖漢巍巍唐基泝測其源乃先孕虞育  
夏甄商陶周然後宣二祖之重光襲四宗之緝熙神靈  
日燭光被六幽仁風翔乎海表威靈行於鬼區慝亡迫  
而不泯微胡瑣而不頤故夫顯定三才昭登之績匪堯  
不興鋪聞遺策在下之訓匪漢不弘厥道至平經緯乾



坤出入三光外運混元內浸毫芒性類循理品物咸亨  
其已久矣盛哉皇家帝世德臣列辟功君百王榮鏡宇  
宙尊無與抗乃始虔輦勞謙兢兢業業貶成抑定不敢  
論制作至今遷正黜色賓監之事煥揚宇內而禮官儒  
林屯朋篤論之士而不傳祖宗之彷彿雖云優慎無乃  
蕙歟於是三事獄牧之僚僉爾而進曰陛下仰監唐典  
中述祖則俯蹈宗軌躬奉天經惇睦辨章之化洽巡靖  
黎蒸懷保鰥寡之惠浹燔瘞縣沈肅祇羣臣之禮備是



以鳳凰來儀集羽族於觀魏肉角馴毛宗於外園擾縉  
文皓質於郊升黃暉采鱗於沼甘露霄零於豐草三足  
軒翥於茂樹若乃嘉穀靈草奇獸神禽應圖合謀窮祥  
極瑞朝夕坰牧日月邦畿卓犖乎方州洋溢乎要荒昔  
姬有素雉朱鳥玄秬黃蓼之事耳君臣動色左右相趨  
濟濟翼翼峨峨如也蓋用昭明寅畏承聿懷之福亦以  
寵靈文武貽燕後昆覆以懿鑠豈其為身而有顓辭也  
若然受之宜亦勤恁旅力以充厥道啓恭館之金滕御



東序之秘寶以流其占夫圖書亮章天祐也孔猷先命  
聖孚也體行德本正性也逢吉丁辰景命也順命以創  
制定性以和神答三靈之繁祉展故唐之明文茲事體  
大而允寤寐次於聖心瞻前顧後豈蔑清廟憚救天乎  
伊考自邃古乃降戾爰茲作者七十有四人有不俾而  
假素罔光度而遺章今其如台而獨闕也是時聖上固  
已垂精游神包舉藝文屢訪羣儒俞咨故老與之乎斟  
酌道德之淵源肴覈仁義之林藪以望元符之臻焉既



成羣后之謹辭又悉經五繇之碩慮矣將緝萬嗣揚洪  
暉奮炎景扇遺風播芳烈久而愈新用而不竭汪汪乎  
丕天之大律其疇能亘之哉唐哉皇哉皇哉唐哉固後  
以母喪去官永元初大將軍竇憲出征匈奴以固為中  
護軍與參議北單于聞漢軍出遣使款居延塞欲修呼  
韓邪故事朝見天子請大使憲上遣固行中郎將事將  
數百騎與虜使俱出居延塞迎之會南匈奴掩破北  
庭固至私渠海聞虜中亂引還及竇憲敗固先坐免官



固不教學諸子諸子多不遵法度吏人苦之初洛陽令  
种兢嘗行固奴干其車騎吏椎呼之奴醉罵兢大怒畏  
憲不敢發心銜之及竇氏皆逮考兢因此捕繫固遂死  
獄中時年六十一詔以譴責兢抵王者吏罪固所著典  
引賓戲應譏詩賦銘誄頌書文記論議六言在者凡四  
十一篇

第五倫字伯魚京兆長陵人也其先齊諸田諸田徙園  
陵者多故以次第為氏倫少介然有義行王莽末盜賊



起宗族閭里爭往附之倫乃依險固築營壁有賊輒奮

厲其衆引彊持滿以拒之銅馬赤眉之屬前後數十輩

皆不能下倫始以營長詣郡尹鮮于褒褒見而異之署

為吏後褒坐事轉高唐令臨去握倫臂訣曰恨相知晚

倫後為鄉嗇夫平徭賦理怨結得人歡心自以為久宦

不達遂將家屬客河東變姓名自稱王伯齊載鹽往來

太原上黨所過輒為蠹除而去

蠹除猶  
掃除也

陌上號為道士

親友故人莫知其處數年鮮于褒薦之於京兆尹閭興



興即召倫為主簿時長安鑄錢多姦巧乃署倫為督鑄

錢掾領長安市倫平銓衡正斗斛市無阿枉百姓悅服

每讀詔書常歎曰此聖主也一見決耳等輩笑之曰爾

說將將謂州將也尚不下安能動萬乘以倫曰未遇知己道

不同故耳建武二十七年舉孝廉補淮陽國璽工長隨

王之國光武召見甚異之二十九年從王朝京師隨官

屬得會見帝問以政事倫因此酬對政道帝大悅明日

復持召入與語至夕帝戲謂倫曰聞卿為吏夢婦公不



過從兄飯寧有之邪對曰臣三娶妻皆無父少遭飢亂  
實不敢妄過人食帝大笑倫出有詔以為扶夷長未到  
官追拜會稽太守雖為二千石躬自斬菟養馬妻執炊  
爨受俸裁留一月糧餘皆賤買與民之貧羸者會稽俗  
多淫祀好卜筮民常以牛祭神百姓財產以之困匱其  
自食牛肉不以薦祠者發病且死先為牛鳴前後郡將  
莫敢禁倫到官移書屬縣曉告百姓其巫祝有依託鬼  
神詐怖愚民皆案論之有妄屠牛者吏輒行罰民初頗



恐懼或祝詛妄言倫案之愈急後遂斷絕百姓以安永平五年坐法徵老小攀車叩馬嗥呼相隨日繞行數里不得前倫乃為止亭舍陰乘船去衆復追之及詣廷尉吏民上書守闕者千餘人是時顯宗方案梁松事亦多為松訟者帝患之詔公車諸為梁氏及會稽太守上書者勿復受會帝幸廷尉錄囚徒得免歸田里身自耕種不交通人物數歲拜為宕渠令顯拔鄉佐元賀賀後為九江沛二郡守以清潔稱所在化行終於大司農倫在



職四年遷蜀郡太守蜀地肥饒吏民富實掾史家貲多  
至千萬皆鮮車怒馬

謂馬之肥壯其氣憤怒也

以財貨自達倫悉簡

其豐贍者遣還之更選孤貧志行之人以處曹任於是  
爭賕抑絕文職修理所舉吏多至九卿二千石世以為  
知人視事七歲肅宗初立擢自遠郡代牟融為司空帝  
以明德太后故尊崇舅氏馬廖兄弟並居職任廖等傾  
身交結冠蓋之士爭赴趨之倫以后族過盛欲令朝廷  
抑損其權上疏曰書言臣無作威作福其害于而家凶



于而國傳稱大夫無境外之交束脩之饋近代光烈皇  
后雖友愛天至而卒使陰就歸國徙廢陰興賓客其後  
梁竇之家互有非法明帝即位竟多誅之自是洛中無  
復權戚書記請託一皆斷絕又譬諸外戚曰若身待士  
不如為國戴盆望天事不兩施臣常刻著五臟書諸紳  
帶而今之議者復以馬氏為言竊聞衛尉廖以布三千  
足城門校尉防以錢三百萬私贍三輔衣冠知與不知  
莫不畢結又聞臘日亦遺其在洛中者錢各五千越騎



校尉光臘用羊三百頭米四百斛肉五十斤臣愚以為  
不應經義惶恐不敢以不聞陛下請欲厚之亦宜所以  
安之臣今言此誠欲上忠陛下下全后家裁蒙省察及  
馬防為車騎將軍當出征西羌倫又上疏曰臣愚以為  
貴戚可封侯以富之不當職事以任之何者繩以法則  
傷恩私以親則違憲伏聞馬防今當西征臣以太后恩  
仁陛下至孝恐卒有纖介難以意愛聞防請杜篤為從  
事中郎多賜財帛篤為鄉里所廢客居美陽女弟為馬



氏妻恃此交通在所縣令苦其不法收繫論之今來防  
所議者咸致疑怪況乃以為從事將恐議及朝廷今宜  
為選賢能以輔助之不可復令防自請人有損事望書  
奏並不省用倫雖峭直然常疾俗吏苛刻及為三公值  
帝長者屢有善政乃上疏褒稱盛美因以勸成風德曰  
陛下以寬弘臨下出入四年前歲誅刺史二千石貪殘  
者六人斯皆明聖所鑒非羣下所及然詔書每下寬和  
而政急不解務存節儉而奢侈不止者咎在俗敎羣下



不稱故也光武承王莽之餘頗以嚴猛為政後代因之  
遂成風化今郡國所舉類多辦職俗吏殊未有寬博之  
選以應上求也陳留令劉豫冠軍令駟協並以刻薄之  
姿臨人宰邑專念掠殺務為嚴苦吏民愁怨莫不疾之  
而今之議者反以為能違天心失經義誠不可不慎也  
非徒應坐豫協亦當宜譴舉者務進仁賢以任時政不  
過數人則風俗自化矣又聞諸王主貴戚驕奢踰制京  
師尚然何以示遠故曰其身不正雖令不行以身教者



從以言教者訟夫陰陽和歲乃豐君臣同心化乃成也  
其刺史太守以下拜除京師及道出洛陽者宜皆召見  
可因博問四方無以觀察其人諸上書言事有不合者  
可但報歸田里不可過加喜怒以明在寬及諸馬得罪  
歸國而竇氏始貴倫復上疏曰伏見虎賁中郎將竇憲  
以椒房之親典司禁兵出入省闈年盛志美卑謙樂善  
此誠其好士交結之方然諸出入貴戚者類多瑕釁禁  
錮之人尤少守約安貧之節士大夫無志之徒更相販



賣雲集其門衆煦飄山聚蚊成雷蓋驕佚之所從生也  
三輔論者至云以貴戚廢錮當復以貴戚浣濯之猶解  
醒當以酒也詖險趣執之徒誠不可親近臣愚願陛下  
中宮嚴勅憲等閉門自守無妄交通士大夫防其未萌  
慮於無形令憲等保福祿君臣交歡無纖介之隙此臣  
之至願也倫奉公盡節言事無所依違諸子或時諫止  
輒叱遣之吏人奏記及便宜者亦并封上其無私若此  
性質慤少文采在位以貞白稱時人方之前朝貢禹然



少醞藉少威儀亦以此見輕或問倫曰公有私乎對曰  
昔人有與吾千里馬吾雖不受每三公有所選舉心不  
能忘而亦終不用也吾兄子嘗病一夜十往退而安寢  
吾子有疾雖不省視而竟夕不眠若是者豈可謂無私  
乎連以老病上疏乞身元和三年賜策罷以二千石奉  
終其身加賜錢五十萬公宅一區後數年卒時年八十  
餘詔賜祕器衣衾錢布少子頡嗣厯桂陽廬江南陽太  
守所在見稱順帝之為太子廢也頡為太中大夫與太



僕來厯等共守閬固爭帝即位擢為將作大匠卒官倫  
曾孫種字興先少厲志義為吏冠名州郡永壽中以司  
徒掾清詔使冀州廉察災害舉奏刺史二千石以下所  
刑免甚衆棄官奔走者數十人還以奉使稱職拜高密  
侯相是時徐兗二州盜賊羣輩高密在二州之郊種乃  
大儲糧秣勤厲吏士賊聞皆憚之桴鼓不鳴流民歸之  
者歲中至數千家以能換為衛相遷兗州刺史中常侍  
單超兄子匡為濟陰太守負執貪放種欲收舉未知所



使會聞從事衛羽素抗厲乃召羽具告之謂曰聞公不  
畏疆禦今欲相委以重事若何對曰願庶幾於一割羽  
出遂馳至定陶閉門收匡賓客親吏四十餘人六七日  
中糾發其賊五六千萬種即奏匡并以劾超匡窘迫遣  
刺客刺羽羽覺其姦乃收繫客具得情狀州內震怖朝  
廷嗟歎之是時太山賊叔孫無忌等暴橫一境州郡不  
能討羽說種曰中國安寧忘戰日久而泰山險阻寇猾  
不制今雖有精兵難以赴敵羽請往譬之種敬諾羽乃



往備說禍福無忌即率其黨與三千餘人降單超積懷  
忿恨遂以事陷種竟坐徙朔方超外孫董援為朔方太  
守稽怒以待之初種為衛相以門下掾孫斌賢善遇之  
及當徙斥斌具聞超謀乃謂其友人同縣閭子直及高  
密甄子然曰蓋盜憎其主從來久矣第五使君當投裔  
土而單超外屬為彼郡守夫危者易仆可為寒心吾今  
方追使君庶免其難若奉使君以還將以付子二人曰  
子其行矣是吾心也於是斌將俠客晨夜追種及之於



太原遮險格殺送吏因下馬與種斌自步從一日一夜行四百餘里遂得脫歸種匿於閭甄氏數年徐州從事臧旻上書為種訟寃會赦出卒於家

鍾離意字子阿會稽山陰人也少為郡督郵時部縣亭長有受人酒禮者府下記也文符案考之意封還記入言

於太守曰春秋先內後外詩云刑于寡妻以御於家邦明政化之本由近及遠今宜先清府內且濶畧遠縣細微之愆太守甚賢之遂任以縣事建武十四年會稽大



疫死者萬數意獨身自隱親經給醫藥所部多蒙全濟  
舉孝廉再遷辟大司徒侯霸府掾詔部送徒詣河內時  
冬寒徒病不能行路過弘農意輒私屬縣使作徒衣縣  
不得已與之而上書言狀意亦具以聞光武得奏以見  
霸曰君所使掾何乃仁於用心誠良吏也意遂於道解  
徒桎梏恣所欲過與尅期俱至無或違者還以病免後  
除瑕丘令吏有檀建者盜竊縣內意屏人問狀建叩頭  
服罪不忍加刑遣令長休建父聞之為建設酒謂曰吾



聞無道之君以刃殘人有道之君以義行誅子罪命也  
令建進藥而死二十五年遷堂邑令邑人防廣為父報  
讎繫獄其母病死廣哭泣不食意憐傷之乃聽廣歸家  
使得殯殮丞掾皆爭意曰罪自我歸義不累下遂遣之  
廣殯母訖果還入獄意密以狀聞廣竟得以減死論顯  
宗即位徵為尚書時交趾太守張恢坐贓千金徵還伏  
法以資物簿入大司農詔班賜羣臣意得珠璣悉以委  
地而不拜賜帝怪而問其故對曰臣聞孔子忍渴於盜



泉之水曾參迴車於勝母之間惡其名也此賊穢之寶  
誠不敢拜帝嗟歎曰清乎尚書之言乃更以庫錢三十

萬賜意轉為尚書僕射車駕數幸廣成苑意以為從禽  
廢政嘗當車陳諫般樂遊田之事天子即時還宮永平  
三年夏旱而大起北宮意詣關免冠上疏曰伏見陛下  
以天時小旱憂念元元降避正殿躬自克責而比日密  
雲遂無大潤豈政有未得應上天者邪昔成湯遭旱以  
六事自責曰政不節邪使人疾邪宮室榮邪女色盛邪



苞苴行邪讒夫昌邪竊見北宮大作人失農時此所謂  
宮室榮也自古非若宮室小狹但患人不安寧宜且罷  
止以應天心帝詔報意令冠履勿謝又勅大匠止作諸  
宮減省不急因謝公卿百僚遂應時澍雨焉時詔賜降  
胡子鱣尚書案事誤以十為百帝見司農上簿大怒召  
郎將答之意因入叩頭曰過誤之失常人所容若以懈  
慢為愆則臣位大罪重郎位小罪輕咎皆在臣臣當先  
坐乃解衣就格帝意解使復冠而貫郎帝性褊察好以



耳目隱發為明故公卿大臣數被詆毀近臣尚書以下至見提拽常以事怒郎藥崧以杖撞之崧走入牀下帝怒甚疾言曰郎出郎出崧曰天子穆穆諸侯煌煌未聞人君自起撞郎帝赦之朝廷莫不悚慄爭為嚴切以避誅責唯意獨敢諫諍數封還詔書臣下過失輒救解之會連有變異意復上疏曰伏惟陛下躬行孝道修明經術郊祀天地敬畏鬼神憂卹黎元勞心不怠而天氣未和日月不明水泉湧溢寒暑違節者咎在羣臣不能宣



化理職而以苛刻為俗吏殺良人繼踵不絕百官無相親之心吏人無雍雍之志至於骨肉相殘毒害彌深感逆和氣以致天災百姓可以德勝難以力服先王要道民用和睦故能致天下和平災害不生禍亂不作鹿鳴之詩必言宴樂者以人神之心洽然後天氣和也願陛下垂聖德揆萬幾詔有司慎人命緩刑罰順時氣以調陰陽垂之無極帝雖不能用然知其至誠亦以此故不得久留出為魯相後德陽殿成百官大會帝思意言謂



公卿曰鍾離尚書若在此殿不立意視事五年以愛利  
為化人多殷富以久病卒官遺言上書陳升平之世難  
以急化宜少寬假帝感傷其意下詔嗟歎賜錢二十萬  
藥崧者河內人天性朴忠家貧為郎當獨直臺上無被  
枕杌思漬反食糟糠帝每夜入臺輒見崧問其故甚嘉  
之自此詔太官賜尚書以下朝夕餐給帷被皂袍及侍  
史二人崧官至南陽太守

宋均字叔庠南陽安衆人也父伯建武初為五官中郎



將均以父任為郎時年十五好經書每休沐日輒受業  
博士通詩書善論難至二十餘調補辰陽長其俗少學  
者而信巫鬼均為立學校禁絕淫祀人皆安之以祖母  
喪去官客授潁川後為謁者會武陵蠻反圍威武將軍  
劉尚詔使均乘傳發江夏奔命三千人往救之既至而  
尚已沒會伏波將軍馬援至詔因令均監軍與諸將俱  
進賊拒抗不得前及馬援卒於師軍士多溫溼疾病死  
者大半均慮軍遂不反乃與諸將議曰今道遠士病不



可以戰欲權承制降之何如諸將皆伏地莫敢應均曰  
夫忠臣出境有可以安國家專之可也乃矯制調伏波  
司馬呂种守沅陵長命种奉詔書入虜營告以恩信因  
勒兵隨其後蠻夷震怖即共斬其大帥而降於是入賊  
營散其衆遣歸本郡為置長吏而還均未至先自劾矯  
制之罪光武嘉其功迎賜以金帛令過家上冢其後每  
有四方異議數訪問焉遷上蔡令時府下記禁喪葬不  
得侈長均曰夫送終踰制失之輕者今有不義之民尚



未循化而遽罰過禮非政之先竟不肯施行遷九江太守郡多虎暴數為民害常募設檻穽猶多傷害均到下記屬縣曰夫虎豹在山鼃鼃在水各有所託且江淮之有猛獸猶北土之有雞豚也今為民害咎在殘吏而勞勤張捕非憂恤之本也其務退姦貪思進忠善可一去檻穽削除課制其後傳言虎相與東游渡江中元元年山陽楚沛多蝗其飛至九江界者輒東西散去由是名稱遠近浚遒縣有唐后二山民共祠之衆巫取百姓男



女以為公姬

以男為山公以女為山姬猶祭之有尸主

歲歲改易既而不敢

嫁娶前後守令莫敢禁均乃下書曰自今以後為山娶

者皆娶巫家勿擾良民於是遂絕永平元年遷東海相

在郡五年坐法免官客授潁川而東海吏民思均恩化

為之作歌詣闕乞還者數千人顯宗以其能七年徵拜

尚書令每有駁議多合上旨均常刪翦疑事帝以為有

姦大怒收郎縛格之諸尚書惶恐皆叩頭謝罪均顧厲

色曰蓋忠臣執義無二心若畏威失正均雖死不易志



小黃門在傍入具以聞帝善其不撓即令貫郎遷均司  
隸校尉數月出為河內太守政化大行均常寢病百姓  
耆老禱請旦夕問起居其為民愛若此以疾上書乞免  
詔除子條為太子舍人均自扶輿詣闕謝恩帝使中黃  
門慰問因留養疾時司徒缺帝以均才任宰相召入視  
其疾令兩騶騶養馬者扶之均拜謝曰天罰有罪所苦浸篤  
不復奉望帷幄因流涕而辭帝甚傷之召條扶持均出  
賜錢三十萬均性寬和不喜文法常以為吏能弘厚雖



貪汙放縱猶無所害至於苛察之人身或廉法而巧黠  
刻削毒加百姓災害流亡所由而作及在尚書恒欲叩  
頭爭之以時方嚴切故遂不敢陳帝後聞其言而追悲  
之建初元年卒於家族子意字伯志父京以大夏侯尚  
書教授至遼東太守意傳父業顯宗時舉孝廉以召對  
合旨擢拜阿陽侯相建初中徵為尚書肅宗性寬仁而  
親親之恩篤故叔父濟南中山二王每數入朝特加恩  
寵及諸昆弟並留京師不遣就國意以為人臣有節不



宜踰禮過恩乃上疏諫曰陛下至孝烝烝恩愛隆深以濟南王康中山王馬先帝昆弟特蒙禮寵聖情戀戀不忍遠離比年朝見久留京師崇以叔父之尊同之家人之禮車入殿門即席不拜分甘損膳賞賜優渥昔周公懷聖人之德有致太平之功然後王曰叔父加以錫幣今康馬幸以支庶享食大國陛下即位蠲除前過還所削黜衍食他縣男女少長並受爵邑恩寵踰制禮敬過度春秋之義諸父昆弟無所不臣所以尊尊卑卑彊幹



弱枝者也陛下德業隆盛當為萬世典法不宜以私恩  
損上下之序失君臣之正又西平王羨等六王皆妻子  
成家官屬備具當早就蕃國為子孫基趾而室第相望  
久磐京邑婚姻之盛過於本朝僕馬之衆充塞城郭驕  
侈僭擬寵祿隆過今諸國之封並皆膏腴風氣平調道  
路夷近朝聘有期行來不難且割情不忍以恩斷義發  
遣康焉各歸蕃國今羨等速就便時以塞衆望帝納之  
章和二年鮮卑擊破北匈奴而南單于乘此請兵北伐



因欲還舊庭時竇太后臨朝議欲從之意上疏曰夫戎狄之隔遠中國幽處北極界以沙漠簡賜禮義無有上下疆者為雄弱者屈伏自漢興以來征伐數矣其所尅獲曾不補害光武皇帝躬服金革之難深昭天地之明故因其來降羈縻畜養邊人得生勞役休息於茲四十餘年矣今鮮卑奉順斬獲萬數中國坐享大功而百姓不知其勞漢德於斯為盛所以然者夷虜相攻無損漢兵者也臣察鮮卑侵伐匈奴正是利其抄掠及歸功聖



朝實由貪得重賞今若聽南虜還歸北庭則不得不禁  
制鮮卑鮮卑外失暴掠之願內無功勞之賞豺狼貪婪  
必為邊患今北虜西遁請求和親宜因其歸附以為外  
扞巍巍之業無以過此若引兵費賦以順南虜則坐失  
上略去安即危矣誠不可許會南單于竟不北徙遷司  
隸校尉永元初大將軍竇憲兄弟貴盛步兵校尉鄧疊  
河南尹王調故蜀郡太守廉范等羣黨出入憲門負勢  
縱放意隨違舉奏無所回避由是與竇氏有隙二年病



卒孫俱靈帝時為司空

寒朗字伯奇

寒高氏小史作蹇

魯國薛人也生三日遭天下亂

棄之荆棘數日兵解母往視之猶尚氣息遂收養之及長好經學博通書傳以尚書教授舉孝廉永平中以謁者守侍御史與三府掾屬共考按楚獄顏忠王平等辭連及隧鄉侯耿建朗陵侯臧信護澤侯鄧鯉曲成侯劉建建等辭未嘗與忠平相見是時顯宗怒甚吏皆惶恐諸所連及率一切陷入無敢以情恕者朗心傷其寃試



以建等物色

物色謂形狀也

獨問忠平而二人錯愕不能對朗

知其詐乃上言建等無姦專為忠平所誣疑天下無辜

類多如此帝乃召朗入問曰建等即如是忠平何故引

之朗對曰忠平自知所犯不道故多有虛引冀以自明

帝曰即如是四侯無事何不早奏獄竟而入繫至今邪

朗對曰朗雖考之無事然恐海內別有發其姦者故未

敢時上帝怒罵曰吏持兩端促提下左右方引去朗曰

願一言而死小臣不敢欺欲助國耳帝問曰誰與共為



章對曰臣自知當必族滅不敢多汙染人誠冀陛下  
一覺悟而已臣見考囚在事者咸言妖惡大故臣子所宜  
同疾今出之不如入之可無後責是以考一連十考十  
連百又公卿朝會陛下問得失皆跪言舊制大罪禍及  
九族陛下大恩裁止於身天下幸甚及其歸舍口雖不  
言而仰屋竊歎莫不知其多冤無敢悟陛下者臣今所  
陳誠死無悔帝意少解詔遣朗出後二日車駕自幸洛  
陽獄錄囚徒理出千餘人後平忠死獄中朗乃自繫會



赦免官復舉孝廉建初中肅宗大會羣臣朗前謝恩詔以朗納忠先帝拜為易長歲餘遷濟陽令以母喪去官百姓追思之章和元年上行東巡狩過濟陽三老吏人上書陳朗前政狀帝至梁召見朗詔三府為辟首由是辟司徒府永元中再遷清河太守坐法免永初三年太尉張禹薦朗為博士徵詣公車會卒時年八十四

朱暉字文季南陽宛人也家世衣冠暉早孤有氣決年十三王莽敗天下亂與外氏家屬從田間奔入宛城道



遇羣賊白刃劫諸婦女略奪衣物昆弟賓客皆惶迫伏  
地莫敢動暉拔劔前曰財物皆可取耳諸母衣不可得  
今日朱暉死日也賊見其小壯其志笑曰童子內刀遂  
捨之而去初光武與暉父岑俱學長安有舊故及即位  
求問岑時已卒乃召暉拜為郎暉尋以病去卒業於太  
學性矜嚴進止必以禮諸儒稱其高永平初顯宗舅新  
陽侯陰就慕暉賢自往候之暉避不見復遣家臣致禮  
暉遂閉門不受就歎曰志士也勿奪其節後為郡吏太



守阮况嘗欲市暉牛暉不從及况卒暉乃厚贈送其家  
人或譏焉暉曰前阮府君有求於我所以不敢聞命誠  
恐以財貨汙君令而相送明吾非有所愛也驃騎將軍  
東平王蒼聞而辟之甚禮敬焉正月朔旦蒼當入賀故  
事少府給壁是時陰就為府卿貴驕吏傲不奉法蒼坐  
朝堂漏且盡而求壁不可得顧謂掾屬曰若之何暉望  
見少府主簿持壁即往給之曰我數聞壁而未嘗見試  
請觀之主簿以授暉暉顧召令史奉之主簿大驚遽以



白就就曰朱掾義士勿復求更以他壁朝蒼既罷召暉  
謂曰屬者掾自視孰與蘭相如帝聞壯之及當幸長安  
欲嚴宿衛故以暉為衛士令再遷臨淮太守暉好節槩  
有所拔用皆厲行士其諸報怨以義犯率皆為求其理  
多得生濟其不義之囚即時僵仆吏民畏愛為之歌曰  
彊直自遂南陽朱季吏畏其威民懷其德數年坐法免  
暉剛於為吏見忌於上所在多被劾自去臨淮屏居野  
澤布衣蔬食不與邑里通鄉黨譏其介建初中南陽大



饑米石千餘暉盡散其家貲以分宗里故舊貧羸者鄉族皆歸焉初暉同縣張堪素有名稱嘗於太學見暉甚重之接以友道乃把暉臂曰欲以妻子託朱生暉以堪先達舉手不敢對自後不復相見堪卒暉聞其妻子貧困乃自往候視厚賑贍之暉少子頡怪而問曰大人不與堪為友平生未嘗相聞子孫竊怪之暉曰堪常有知己之言吾以信於心也暉又與同郡陳揖交善揖早卒有遺腹子友暉常哀之及司徒桓虞為南陽太守召暉



子駢為吏暉辭駢而薦友虞歎息遂召之其義烈如此  
元和中肅宗南巡狩告南陽太守暉起居召拜為尚  
書僕射歲中遷太山太守暉上疏乞留中詔許之因上  
便宜陳密事深見嘉納詔報曰補公家之闕不累清白  
之素斯善美之士也俗吏苟合阿意面從進無蹇蹇之  
志卻無退思之念患之甚久惟今所言適我願也生其  
勉之是時穀貴縣官經用不足朝廷憂之尚書張林上  
言穀所以貴由錢賤故也可盡封錢一取布泉為租以



通天下之用又鹽食之急者雖貴人不得不須官可自

鬻

鬻古煮字

又宜因交趾益州上計吏往來市珍寶收採其

利武帝時所謂均輸者也於是詔諸尚書通議暉奏據  
林言不可施行事遂寢後陳事者復重述林前議以為  
於國誠便帝然之有詔施行暉復獨奏曰王制天子不  
言有無諸侯不言多少食祿之家不與百姓爭利今均  
輸之法與賈販無異鹽利歸官則人窮怨布帛為租則  
吏姦盜誠非明主所當宜行帝卒以林等言為然得暉



重議因發怒切責諸尚書暉等皆自繫獄三日詔勅出之曰國家樂聞駁議黃髮無愆詔書過耳何故自繫暉因稱疾篤不肯復署議尚書令以下惶怖謂暉曰今臨得譴讓奈何稱疾其禍不細暉曰行年八十蒙恩得在機密當以死報若心知不可而順旨雷同負臣子之義今耳目無所聞見伏待死命遂閉口不復言諸尚書不知所為乃共劾奏暉帝意解寢其事後數日詔使直事郎問暉起居太醫視疾太官賜食暉乃起謝復賜錢十



萬布百疋衣十領後遷尚書令以老乞身拜騎都尉賜錢二十萬和帝即位竇憲北征匈奴暉復上疏諫頃之病卒子頡修儒術安帝時至陳相頡子穆字公叔年五歲便有孝稱父母有病輒不飲食差乃復常及壯耽學銳意講誦或時思至不自知亡失衣冠顛隊阬岸其父常以為專愚幾不知數馬足穆愈更精篤初舉孝廉順帝末江淮盜賊羣起州郡不能禁或說大將軍梁冀曰朱公叔無資文武海內奇士若以為謀主賊不足平也



冀亦素聞穆名乃辟之使典兵事甚見親任及桓帝即位順烈太后臨朝穆以冀執地親重望有以扶持王室因推災異奏記以勸戒冀曰穆伏念明年丁亥之歲刑德合於乾位易經龍戰之會其文曰龍戰於野其道窮也謂陽道將勝而陰道負也今年九月天氣鬱冒五位四候連失正氣此互相明也夫善道屬陽惡道屬陰若修正守陽推抑惡類則福從之矣穆每事不逮所好唯學傳授於師時有可試願將軍少察愚言申納諸儒而



親其忠正絕其姑息專心公朝割除私欲廣求賢能斥  
遠佞惡夫人君不可不學當以天地順道漸漬其心宜  
為皇帝選置師傅及侍講者得小心忠篤敦禮之士將  
軍與之俱入參勸講授師賢法古此猶倚南山坐平原  
也誰能傾之今年夏月暈房星明年當有小厄宜急誅  
姦臣為天下所怨毒者以塞災咎議郎大夫之位本以  
式序儒術高行之士今多非其人九卿之中亦有乖其  
任者惟將軍察焉又薦种暠樂巴等而明年嚴鮪謀立



清河王蒜又黃龍二見沛國冀無術學遂以穆龍戰於  
野之言為應於是請嵩為從事中郎薦已為議郎舉穆  
高第為侍御史時同郡趙康叔盛者隱於武當山清靜  
不仕以經傳教授穆時年五十乃奉書稱弟子及康歿  
喪之如師其尊德樂道為當時所服常感時澆薄慕尚  
敦篤乃作崇厚論以明所守又著絕交論亦矯時之作  
梁冀驕暴不悛朝野嗟毒穆以故吏懼其釁積招禍復  
奏記諫曰古之明君必有輔德之臣規諫之官下至器



物銘書成敗以防遺失故君有正道臣有正路從之如  
升堂違之如赴壑今明將軍地有申伯之尊位為羣公  
之首一日為善天下歸仁終朝為惡四海傾覆頃者官  
吏俱匱加以水蟲為害京師諸官費用增多詔書發調  
或至十倍各言官無見財皆當出人榜掠剝割疆令充  
足公賦既重私斂又深牧守長吏多非德選貪聚無厭  
遇人如虜或絕命於箠楚之下或自賊於迫切之求又  
掠奪百姓皆託之尊府遂令將軍結怨天下吏民酸毒



道路嘆嗟誠所不忍聞也往者永和之末綱紀少弛而馬勉之徒乘敝而起荆揚之間幾成大患幸賴順烈皇后初政清靜外內同力僅乃討定今百姓戚戚困於永和內非仁愛之心可得容忍外非守國之計所宜久安也夫將相大臣均體元首共輿而馳同舟而濟輿傾舟覆患實共之豈可以去明即昧履危自安主孤時困而莫之卹乎宜時易宰守非其人者減省第宅園池之費拒絕郡國諸所奉送內以自明外解人惑使挾姦之吏



無所依託司察之臣得盡耳目憲度既張遠邇清一則將軍身尊事顯德耀無窮矣冀不納而縱放日滋遂復賂遺左右交通宦者任其子弟賓客以為州郡要職穆又奏記極諫冀終不悟報書云如此僕亦無一可邪穆言雖切然亦不甚罪也永興元年河溢漂害人庶數十萬戶百姓荒饉流移道路冀州盜賊尤多故擢穆為冀州刺史州人有宦者三人為中常侍並以檄謁穆穆疾之辭不相見冀部令長聞穆濟河解印綬去者四十餘



人及到奏劾諸部至有自殺者以威略權宜盡誅賊渠  
即舉劾權貴或乃死獄中有宦者趙忠喪父歸葬安平  
僭為璵璠玉匣偶人穆聞之下郡案驗吏畏其嚴明遂  
發墓剖棺陳尸出之而收其家屬帝聞大怒徵穆詣廷  
尉輸作左校太學書生劉陶等數千人詣闕上書訟穆  
曰伏見弛刑徒朱穆處公憂國拜州之日志清姦惡誠  
以常侍貴寵父兄子弟布在州郡競為虎狼噬食小人  
故穆張理天網補綴漏目羅取殘禍以塞天意由是內



宦咸共患疾謗讟煩興讒隙仍作極其刑謫輸作左校  
天下有識皆以穆同勤禹稷而被共鯀之戾若死者有  
知則唐帝怒於崇山重華忿於蒼墓矣當今中官近習  
竊持國柄手握王爵口含天憲運賞則使餓隸富於季  
孫呼噏則令伊顏化為桀跖而穆獨亢然不顧身害非  
惡榮而好辱惡生而好死也徒感王網之不攝懼天網  
之久失故竭心懷憂為上深計臣願黔首繫趾代穆校  
作帝覽其奏乃赦之穆居家數年在朝諸公多有推薦



者於是拜徵尚書穆既深疾宦官及在臺閣旦夕共事  
志欲除之乃上疏曰案漢故事中常侍參選士人建初  
以後乃悉用宦者自延平以來浸益貴盛假貂璫之飾  
處常伯之任天朝故事一更其手權傾海內寵貴無極  
放濫驕溢漁食百姓臣以為可悉罷省更選海內清淳  
之士明達國體者以補其處帝不納後穆因進見口復  
陳曰臣聞漢家舊典置侍中中常侍各一人省尚書事  
黃門侍郎一人傳發書奏皆用世族自和熹太后以女



主稱制不接公卿乃以閹人為常侍小黃門通命兩宮  
自此以來權傾人主窮困天下宜皆罷遣博選耆儒宿  
德與參故事帝怒不應穆伏不肯起左右傳出良久乃  
趨而去自此中官數因事稱詔詆毀之穆素剛不得意  
居無幾憤懣發疽延熹六年卒時年六十四祿仕數十  
年蔬食布衣家無餘財公卿共表穆立節忠清虔恭機  
密守死善道宜蒙旌寵策詔褒述追贈益州太守所著  
論策奏教書詩記嘲凡二十篇穆前在冀州所辟用皆



清德長者多至公卿州郡子野少有名節仕至河南尹  
初穆父卒穆與諸儒考依古義謚曰貞宣先生及穆卒  
蔡邕復與門人共述其體行謚為文忠先生

樂恢字伯奇京兆長陵人也父親為縣吏得罪於令收  
將殺之恢年十一常俯伏寺門晝夜號泣令聞而矜之  
即解出親恢常好經學事博士焦永永為河東太守恢  
隨之官閉廬精誦不交人物後永以事被考諸弟子皆  
以通闕被繫恢獨皦然不污於法遂篤志為名儒性廉



直介立行不合已者雖貴不與交信陽侯陰就數致禮  
請恢恢絕不答後仕本郡吏太守坐法誅故人莫敢往  
恢獨奔喪行服坐以抵罪歸復為功曹選舉不阿請託  
無所容同郡楊政數衆毀恢復舉政子為孝廉由是鄉  
里歸之辟司空牟融府會蜀郡太守第五倫代融為司  
空恢以與倫同郡不肯留薦潁川杜安而退諸公多其  
行連辟之遂皆不應後徵拜議郎會車騎將軍竇憲出  
征匈奴恢數上書諫爭朝廷稱其忠入為尚書僕射是



時河南尹王調洛陽令李阜與竇憲厚善縱舍自由恢  
劾奏調阜并及司隸校尉諸所刺舉無所回避貴戚惡  
之憲弟夏陽侯瓌欲往候恢恢謝不與通憲兄弟放縱  
而忽其不附已妻每諫恢曰昔人有容身避害何必以  
言取怨恢歎曰吾何忍素餐立人之朝乎遂上疏諫曰  
臣聞百王之失皆由權移於下大臣執國常以執盛為  
咎伏念先帝聖德未永早棄萬國陛下富於春秋纂承  
大統諸舅不宜幹正王室以示天下之私經曰天地垂



互衆物夭傷君臣失序萬人受殃政失不救其極不測  
方今之宜上以義自割下以謙自引四舅可長保爵土  
之榮皇太后永無慚負宗廟之憂誠策之上者也書奏  
不省時竇太后臨朝和帝未親萬機恢以意不得行乃  
稱疾乞骸骨詔賜錢太醫視疾恢薦任城郭均成陽高  
鳳而遂稱篤拜騎都尉上書辭謝曰仍受厚恩無以報  
效夫政在大夫孔子所疾世卿持權春秋以戒聖人懇  
惻不虛言也近世外戚富貴必有驕溢之敗今陛下思



慕山陵未遑政事諸舅寵盛權行四方若不能自損誅  
罰必加臣壽命垂盡臨死竭愚惟蒙留神詔聽上印綬  
乃歸鄉里竇憲因是風厲州郡逼脅恢遂飲藥死弟子  
綰經輓者百人衆庶傷痛之後竇氏誅帝始親事恢門  
生何融等上書陳恢忠節除子已為郎中

何敞字文高扶風平陵人也其先家於汝陰六世祖比  
干學尚書於鼂錯武帝時為廷尉正與張湯同時湯持  
深而比干務仁恕數與湯爭雖不能盡得然所濟活者



以千數後遷丹陽都尉因徙居平陵敞父寵建武中為  
千乘都尉以病免遂隱居不仕敞性公正自以趣舍不  
合時務每請召常稱疾不應元和中辟太府宋由府由  
待以殊禮敞議論高常以大體多所匡正司徒袁安亦  
深敬重之是時京師及四方累有奇異鳥獸草木言事  
者以為祥瑞敞通經傳能為天官意甚惡之乃言於二  
公曰夫瑞應依德而至災異緣政而生故鸛鵒來巢昭  
公有乾侯之厄西狩獲麟孔子有兩楹之殯海鳥避風



臧文祀之君子譏焉今異鳥翔於殿屋怪草生於庭際  
不可不察由安懼然不敢答居無何而肅宗崩時竇氏  
專政外戚奢侈賞賜過制倉帑為虛敞奏記由曰比年  
水旱人不收穫涼州緣邊家被凶害中州內郡公私屈  
竭而國家賞賚過度帑藏幾空明公位尊任重責深負  
大上當匡正綱紀下當濟安元元豈但空空無違而已  
哉宜先正己以率羣下還所得賜因陳得失奏王侯奏  
國除苑囿之禁節省浮費賑恤孤窮使恩澤下暢黎庶



悅豫上天聰明必有立應由不能用時齊殤王子都鄉  
侯暢奔弔國憂上書未報侍中竇憲遂令人刺殺暢於  
城門屯衛之中而主名不立敬又說由曰劉暢宗室肺  
腑茅土藩臣來弔大憂上書須報親在武衛致此殘酷  
奉憲之吏莫適討捕蹤跡不顯主名不立敬備數股肱  
職典賊曹故欲親至發所以糾其變而二府以為故事  
三公不與盜賊昔陳平生於征戰之世猶知宰相之分  
云外鎮四夷內撫諸侯使卿大夫各得其宜今二府執



事不深惟大義惑於所聞公縱姦慝莫以為咎惟明公  
運獨見之明昭然勿疑敬不勝所見請獨奏案由乃許  
焉二府聞敞行皆遣主者隨之於是推舉具得事實京  
師稱其正以高第拜侍御史時遂以竇憲為車騎將軍  
大發軍擊匈奴而詔使者為憲弟篤景並起邸第興造  
勞役百姓愁苦敞上疏諫曰臣聞匈奴之為桀逆久矣  
平城之圍慢書之恥此二辱者臣子所為捐軀而必死  
高祖呂后忍怒還忿舍而不誅今匈奴無逆節之罪漢



朝無可慙之耻而盛春東作興動大役元元怨恨咸懷  
不悅而猥復為衛尉篤奉車都尉景繕修館第彌街絕  
里臣雖斗筭之人誠切懷怪以為篤景親近貴臣當為  
百僚儀表今衆軍在道朝廷焦瘠百姓愁苦縣官無用  
而據起大第崇飾玩好非所以垂令德示無窮也宜且  
罷工匠專憂北邊恤人之困書奏不省後拜為尚書復  
上封事曰昔鄭武姜之幸叔段衛莊公之寵州吁愛而  
不教終至凶戾由是觀之愛子若此猶饑而食之以毒



適所以害之也伏見大將軍憲始遭大憂公卿比奏欲  
令典幹國事憲深執謙退固辭盛位懇懇勤言之深  
至天下聞之莫不悅喜今踰年無幾大禮未終卒然中  
改兄弟專朝憲秉三軍之重篤總宮衛之權而虐用百  
姓奢侈僭逼誅戮無罪肆心自快今者論議紛紛咸謂  
叔段州吁復生於漢臣觀公卿懷持兩端不肯極言者  
以為憲等若有匪解之志則已受吉甫褒申伯之功如  
憲等陷於罪辜則自取陳平周勃順呂后之權終不以



憲等吉凶為憂也臣敬區區誠欲計策兩安絕其縣縣  
塞其涓涓上不欲令皇太后損文母之號陛下有誓泉  
之譏下使憲等得長保其福佑也又駙馬都尉瓌雖在  
弱冠有不隱之忠比請退身願抑家權可與參謀聽順  
其意誠宗廟至計竇氏之福敬數切諫言諸竇罪過憲  
等深怨之時濟南王康尊貴驕甚憲乃白出敬為濟南  
太傅敬至國輔康以道義數引法度諫正之康敬焉歲  
餘遷汝南太守敬疾文俗吏以苛刻求當時名譽故在



職以寬和為政立春日常召督郵還府分遣儒術大吏  
案行屬縣顯孝悌有義行者及舉寃獄以春秋義斷之  
是以郡中無怨聲百姓化其恩禮其出居者皆歸養其  
父母追行喪服推財相讓者二百許人置立禮官不任  
文吏又修理鰥陽舊渠百姓賴其利墾田增三萬餘頃  
吏人共刻石頌敞功德及竇氏敗有司奏敞子與夏陽  
侯瓌厚善坐免官永元十二年復徵三遷五官中郎將  
常忿疾中常侍蔡倫倫甚憾之元興元年敞以祠廟嚴




肅微疾不齋後鄧皇后上太傅禹冢敞起隨百官會倫  
因奏敞詐病坐抵罪卒於家





通志卷一百九上





總校官庶吉士 臣侍 朝

校對官助教 臣金學詩

膳錄監生 臣張同翼